


181
:9



槐塘文稿卷三

錢塘汪沆西顥著

傳

包春河太守家傳

君諱濤字春河號梅嶼錢塘人少孤淬志勵學文詞卓
犖康熙辛卯以詩經舉於鄉雍正甲辰成進士授刑部
額外主事君辰入西出不敢一日曠每語同官曰獄事
人命所繫尤當盡心漢張釋之唐徐有功皆以恕求情
者也吾黨當師之衆躋其言居西曹五年多所平反歷
陞本部雲南司郎中己酉

特授甘肅平涼府知府下車洗手奉職整飭綱紀杜絕包
苴一郡竦然前守某承造運糧車二千三百輛并軍營
所需鞍屨繩索毛槽鋤又輪輻鐵掌等物十未及三遽
報工竣奉檄起解君嘆曰軍國重事予敢諉過前人耶
遂不惜工直晝夜督造剋期而成幸免戾譴明年調任
慶陽地屆邊陲李自成蹂躪於前王輔臣倡亂於後民
俗彫劫君至謀生聚復流庸革規例禁苛擾務爲寬大
之政以紓民氣遠近德之所屬環縣土多沙磧又皆峻
坂陡崖氣寒霜早歲僅一穫游饑後丁壯轉徙四方嗣
奉墾荒之令土著無產及流寓客氓紛紛報墾比流亾

漸還各以業主告爭鳴官清丈君思沙磧磽确不同膏
腴而頃畝向無弓口脫一清丈旣罹侵隱之罪復貽加
賦之苦因援咸安府屬折征起科之例剴切陳詞申請
臺使奉文報可環人稱便癸丑緣事鐫秩二級罷歸乾
隆己未補江西贛州府通判大吏廉君名屢行檄委署
郡篆四攝丞縣事三司樞務一所至皆有聲其署贛州
也郡學鄉賢祠燬於火捐貲復之監造站船侵扣冒銷
之弊釐剔一清庚午分校文闈撤棘皆知名士壬申推
陞雲南澂江府路南州知州引年乞休君宦遊三十年
篋無長物歸田後每日晡不能舉火家人詬誶勿顧也

事母李太安人極孝既歿宅兆未卜盡焉心傷力疾營
葬事手操畚缶淚涔涔交睫蓋終身孺慕如一日云包
氏故錢塘望族占籍保安里則自有元諱泰者始科名
文章代有聞人君輯包氏簪纓錄一帙末系以圖用展
敬宗收族之義撰述所存有說書旁見三卷邶鄘衛三
風詩意一卷左國朽言一卷三才備考四卷唐詩律隅
一卷讀莊解若干卷昔昔編一卷則君生前自編年譜
也詩四卷夏邑彭樂君方伯先爲鏤版行之卒年七十
四無子以族姪全嗣女五竝適士族

論曰官箴之美莫過於廉官箴之戒莫甚於貪歷覽史
冊所載循吏諸傳鮮不以廉自律克著清白之操者也
迹君生平處脂膏之地未嘗以纖毫自潤方古廉吏何
多讓焉嗚呼是可以傳矣

翰林院編修何公家傳

公諱玉梁字韋江號樟亭錢塘人祖蘭旌明季杭州府
學生績學多隱德學者稱江澣先生考喬雲康熙丙辰
進士官湖廣桂東縣知縣有循聲公幼卽穎異五歲入
家塾與兄某以記誦相角勝日誦數千言晚課畢私以
他未誦者益之稍長工韻語受業蕭山毛西河檢討門
學益進康熙己卯

聖祖仁皇帝南巡駐驛杭州公隨父迎

鑾擬撰應制詩若干首以年幼格未上檢討爲之序載西河全集年十七補錢塘縣學生康熙甲午舉於鄉雍正癸卯成進士改庶常時新進士始行九卿保舉例而御試詩文爲九重公於九列無薦援特以文章稱

旨拔置詞臣掌院雅重公凡館閣制誥多屬公撰擬進

呈

宸覽甲辰授編修充

大清一統志纂修官丙午充順天鄉試同考官得沈澗張受長王延年等十四人皆知名士丁未以母喪太君

患風痺疾陳情終養歸制府彭城李公廉公名延掌紫陽書院講席自己酉迄丁巳凡九年公持文律甚嚴一字一句之疵抉摘不少恕遇英俊傑出之人亟首錄以爲程式以是爭相鏃厲門下士掇巍科成進士者先後百餘人居恒訓士每引安定規條務求有用之學曰讀書內而無益於身心外不能通達世務雖胸羅萬卷謂之書簏可也生母李太君廣東新會人先是康熙甲辰山寇竊發舉家驚竄太君年十歲陷於賊貝勒某公勦平之凡寇所掠子女航海以北抵京師沁水縣縣丞裘某公嫡母父也倡義贖難民百口得太君詢其父兄名

姓里居悉數不忘異之撫爲女遂媵裘太君同歸桂東
公生公太君居杭時時思父母不寘常爲公道王覺經
尋親故事蹙然而嘆曰予雖隨汝父在桂東時一見吾
父而今又若干年矣汝異日能至粵一訪里居乎言已
嗚咽不自勝公恐傷太君意附舟入粵比至太君父已
歿舅氏徙居香山造門謁見具述太君遣行意相持而
泣畱一年歸蓋順承母志終身如一日云甲子夏徽嚴
衢三郡起蛟大水溺人壞廬墓棺樁浮江而下公傭夫
駕舟自富春江至龕赭之間出沒巨浪撈浮棺五十餘
慕義者接踵而起閱三晝夜又得二百餘具於是編號

繪圖沿途黏示俾子姓認歸其不可識者逾年瘞之已
已蕭山令聘修邑志公校閱舊本多改竄前史而飾爲
美詞其未見正史者官階年號亦僞造居多公細加校
訂如前明何孝子競父醒菴侍御以湘湖水利故爲邑
令鄒魯所殺孝子報讐事具明史舊志削去父子二人
傳以他有勢力者當之公憤曰父以地方公事死子爲
報讐死煌煌國史尚不能沒而獨不見容於邑志公道
何在於是摭尋孝子逸事其一時同事例應竝載者得
書十餘種爲孝子立傳是夜陰風寒慄鐙焰青熒室中
若有鬼神者人以爲異何氏自上虞縣遷杭三百餘年

支族繁衍桂東公會輯家譜閱年久未有續修公依派編圖增立傳記較他姓譜體例爲詳公讀書於諸經中尤邃於周易三禮嘗論易曰易聖人之書也所以明斯道之變易無不在也王弼閒以老莊虛無之說參之誤矣顧言理學者宗程子言數學者宗邵子朱子作本義啓蒙乃兼二說窮極古始謂易本爲卜筮而作謂邵氏先天圖得作易之原謂程子言理甚備於象數猶有關學之未至於此者遂亦翕然嚮往之揣摩圖象日演日高以先天爲先以後天爲次而易經反似承其流矣然程邵二子生同時居同洛相與二十年天下事無不言

程子獨不與言易之數邵子每欲以數學傳程子而程子終不欲邵子旣沒數學無傳今所存之空圖殆不能調絃者之琴譜朱子雖爲之訓釋他日有答王子合書亦自有康節說伏羲八卦近於穿鑿附會之說則學者亦當兩酌而審所當務矣其論三禮曰三禮之學其所以訛異者其端有四有出於前人之所行而後人更之者有出於聖門而傳之各異者有後世諸儒損益前代自爲一朝之典者有專門之學各自名家而以臆見爲先代之訓者察乎此四者而諸家之聚訟可以折其獄矣又曰歸熙甫作孝經敘錄謂其所去者是矣而所存

者又未必純乎孔氏之舊也則莫若俱存之自秦火之後諸儒區區掇拾灰燼而文藝之全者尠矣非孔子復生莫之能復也今世所存如孝經家語大小戴之記要以爲有聖人之微言故莫若俱存之而待學者之自擇耳歸氏之論洵爲讀書不易之良法嗚呼誦公之言可以知公之學識矣所著有齟齬吟四卷賢鑒堂詩存一卷應制格詩一卷南齋記聞四卷史論十二卷柳浦集四卷藏於家歿年六十九子四陳調乾隆丁巳進士河南鞏縣知縣維熊雍正乙卯舉人湖廣祁陽縣知縣陳鯉乾隆辛酉舉人陳燾仁和縣學生孫四人

裘母馮孺人家傳

孺人姓馮氏浙江桐鄉縣人候選同知宿朗公女廣西道監察御史兩淮鹽政敬亭裘公子婦江南南匯縣知縣原巖君配也生而靜慧動必以禮稍長就姆教讀書通大義年十九歸原巖君時侍御已捐館舍事祖姑沈淑人及姑蘇朱兩宜人咸得歡心朱宜人性嚴峻子婦侍側不敢出一語孺人就養左右不失意指每得一味之甘必奉堂上數十年如一日朱宜人嘆以爲孝先是侍御公居諫垣彈擊無所諱避直聲動朝野出按淮鹺脂膏不潤清操益礪囊橐蕭然原巖公胚胎庭訓讀書

砥行不問家人生產孺人黽勉有無堵拄門戶康熙四十七年

聖祖南巡狩兵部侍郎宋公駿業疏薦江浙有文行士六人君以國子監生與焉奉

命入武英殿纂修佩文韻府等書書成議敘授直隸武清縣知縣尋以事罷畱滯銓曹雍正七年

憲皇帝有清釐江南積欠錢糧之

命御史戴公永椿薦君協理寶山縣積欠事竣署福泉縣旋補松江府南匯縣知縣此十餘年中內籌薪米外給輜裝與夫編紵之贈答賓僚之讌集孺人脫釵鬻釧悉

力依理故原巖君得無內顧憂專意王事所至輒著循聲居恒教諸子巖以濟慈檢押不少貸原巖君既歿廉吏子孫無以爲生計出遊四方孺人必以存心利物砥礪廉隅毋貽前人羞爲訓婁縣王明府士瑾與原巖君交稱厚季子肇師依其幕下未幾明府被吏議賓從星散去郡守以厚幣招肇師往孺人手書馳誠之曰王公長者今落職正需汝力不宜遽捨去患難中覘人品炎涼翻覆吾竊恥之明府聞之至爲感泣肇師未婚時鄰郡有富人欲招以爲壻許贈金萬其先世則不可問有勸者曰芝草醴泉寧有根源耶曷就之坐作富家翁肇

師不可歸白孺人孺人驟聞之震怒曰汝祖若父官江南代著清節家雖貧聲名猶在人齒頰汝卽甘下賤獨不念祖父何語旣聲淚俱下肇師懼伏罪且明非本意怒始霽嗚呼士大夫陷溺其本心遇不義富貴旋其面目蒙垢受之不顧人之唾詈者比比矣聞孺人風能無媿乎孺人工韻語風格類唐賢書摹十三行得其神似然韜晦不輕示人歿年七十有六

敕封孺人子四肇晉附貢生出繼伯氏後肇觀早夭肇陽肇師竝國子監生以學行知名孫男二孫女二嫁娶皆士族

論曰自劉子政范蔚宗後傳列女者衆矣或甄錄一節或標紀大凡求其才德懋美識見朗卓萃爲婦爲母之道於一身而有士人之鮮能者歷稽彤史往往難之易曰閑有家悔亾詩曰釐爾女士蓋言女子而有士行者斯足爲家立之閑耳若孺人者庶幾踐之矣

殷貞烈傳

殷氏天津貧家女也父起奉早卒依嫠母傭鍼紉澣濯以自給德容端靜不苟訾笑里黨咸嗟異之同邑邢文貴母趙氏妖耍多穢跡母不察誤以女歸之先是文貴娶某氏趙氏強令與諸少年亂不從藉他故逐去迨女

入門不踰月趙氏亦強之如前女大懟哭終日不食後欲還母家母以窮餓故先期雉經矣女熒熒無所依怡色柔聲晝夜勤操作奉姑不敢懈姑語稍涉於邪輒色變起自防益峻於是趙氏與文貴謀謂非威劫刑制不足懾伏之始侵以語不可繼加以捶撻又不可尋乃縶女手足沃以沸湯復燒鐵烙體上下女嚼齧握爪忍痛飲泣志愈不可奪鄰里哀憐之轉相告語時縣令張君他出太守劉君廉知其事立命尉某往鞠之時女已奄奄纔屬息尉詰其由誘使盡言詭對曰婦自患瘡耳無他也尉曰曷驗之女懼事露暴姑與夫短且得罪急抗聲曰裸體對長官非女子所宜婦實患瘡不願驗也尉不能強歸白太守待重鞠越日女已報絕命矣會令歸親檢諸痕瘡得實逮趙氏與文貴庭劾之一訊具服是日聚觀者數千人咸快女冤得雪而莫不欲唾其姑之面也獄成趙氏及文貴竝寘於法太守嘉女之節又憫其立意忠厚爲文以表之大興章子天垣復徵能言之士歌詠其事夫表厥宅里樹之風聲者良有司之事也播之彤管以佐彰瘁者亦儒生之責也爰摭拾其本末而爲之傳

黃肇敏家傳

肇敏字克成姓黃氏上虞人少穎慧經書過目輒誦年十七爲學官弟子性伉爽不畏強禦樂急人之難窶人子負官鎡將鬻妻以償相持而泣肇敏慨然爲代輸邑有武弁縱兵凌百姓勢張甚莫敢枝梧肇敏列其罪狀揭於監司監司陰庇武弁持兩端不下復揭於院弁卒落職去一邑稱快四十貢入成均戶部侍郎李仙根疏薦於朝辭不赴歸葺漱芳軒貯古法書名畫吟嘯其中以自娛樂同邑周聲鴻能文家四壁立肇敏引與友尋爲治裝促其遊學京師聲鴻渡錢塘江盜舫其篋垂橐以歸肇敏又割膏腴田以資之旣行仍賑卹其家使紓

內顧憂比肇敏入京聲鴻已譽滿長安矣逾年聲鴻授河南商邱令緘書招肇敏肇敏念不見故人久爲之命駕畱一月卽歸瀕行聲鴻厚報之稔其介不敢遽進因密置千金篋中戒僕人勿泄肇敏抵家啓篋僕以實告肇敏嘆曰我知故人故人不知我何耶雖然反之逆故人意吾爲周君代宰可也乃召貧不能葬及過時不能婚娶者給之一夕立盡肇敏家居撰述極富卒年六十三旣歿之二年有宦於粵東者致賻三百金云貸之昔年家人無一知者蓋其生平陰行德而不求人知類如此

陳太學家傳

吾杭老友數年來彫謝殆盡惟陳君對漚僑居邗江予時時念之不寘昨上元夕方作書詢君起居未發越日其嗣子學木馳書遣捷足來告哀寢門一慟老淚如縷縻蓋傷氣類之益孤而風雅之道不振也制淚啓函知君於今甲午年正月四日無疾考終得年六十有九且申請予爲君作傳以垂家乘嗚呼以君之年獲臻中壽矣以君之行誼文章竟不克爲世用而輾軻阨窮以終老其可哀也已雖然君自有不朽者在予與君修襟契之好歷五十年矣稔其生平備悉爰不敢以譎陋辭君

諱臯字江臯對漚其自號也世爲上虞人六世祖小溪公遷錢塘遂占籍焉考澤山翁讀書砥行潛德勿耀研精周易著有河圖洛書解生子三長章以詩古文雄長江左次中君爲翁季子幼穎悟絕人年十二歲喪母哀毀如成人遇諱日或展拜松楸流涕被面嗚咽不能止旁觀咸感動澤山翁不治生產家食饕餮恒不給諸子先後負米出遊君甫壯卽隨兄章同館揚州馬氏玉山堂嶰谷半查兩君廣儲載籍插架十萬卷君得以恣其漁獵見聞日富且從兄章學詩學書業大進聲華雨集時人有陳氏二難之目先是戊午閒陳榕門觀察聘予

纂天津郡邑二志得交查心穀魯存昂季心穀旣君名屬予貽書招之北行同主查氏水西莊對屋而居數晨夕者五年天津爲畿南一大都會舟車往來輻輳名流翕集花天月地合樂傳觴必授簡賦詩君則搖筆立就四座傳觀莫不嘆絕旣念澤山翁春秋高閒歲一歸省迨澤山翁捐館舍兄章年近六十遂僦居於揚與兄章相依杜門不復出時邗江諸詩老亦結有行菴讓圃諸詩社君偕兄聯襪而入更唱迭和詩格益高潔莫攀今沾上題襟韓江雅集二集中所載君詩洵皆卓然可傳也少陵不云乎詩卷長畱天地閒君雖轆軻阨窮以終

老然藉此不朽其亦可以無憾矣猶憶同客津門予有過君必規之今君死而誰規予過乎一詩脫稿必是正於君今君死而誰爲予刪定乎春雨連宵梅花零落鏡昏目暗書君行事又不覺潛潛而莫禁也君所著樂府二卷久授劄劂氏尚有姓氏攷吾盡吾意齋詩文集各若干卷竝藏於家子一卽學未能世其學

太醫院判吉翁家傳

翁諱紹字適菴一字无咎浙江山陰人十世祖某明永樂中從成祖北征以功世襲金帶指揮使累封建業侯遂占籍順天翁少穎異甫就塾覆諸經如夙讀長老咸

林城文和 卷三
奇之考天相遭闖變隱居事母精於醫翁固世其學朝夕造請者幾壓藩康熙庚午

詔輯禁方諸書時翁以高手醫得遇選六載書竣稱旨授太醫院吏目供奉

內廷備蒙

宸眷

屬車所至屢

召隨行每至邊徼文武扈從諸臣或觸冒寒暑刀圭所投無不立起重其術者至比之倉扁蘇董翁無德色也後以微眚被譴退居涿州再遷天津杜門却軌日以著錄

爲事生平纂述有脈源證治六法增補乾坤生意四大劫病救急效方我樂集等書若干卷卒年七十四翁常言曰診視百病傷寒爲難孫思邈撰千金方活人無算而不知傷寒之虛實張仲景論誠爲不刊之典然詳大人而略嬰孺有北方之藥而無南方之治察之不精貽害靡盡又曰古之民也壽今之民也夭雖氣稟日薄亦醫術之不明古之醫者探天人之繁蹟原陰陽之倚伏明營衛之清濁究七八之盛衰辨順逆之盈虛業必要諸三世功務求其十全幼孤遂長老者壽終民生其間熙熙然以遊於化日今之醫者以瘡爲劇以生爲死守

陳方爲科律惜藥準而不知又其甚者嗇術自貴貽患
要財古之壽民今爲殤子不亦宜乎

施太學家傳

錢塘國子生施君廷樞字北亭號慎甫稟質粹美嗜讀
書甫冠謝去科舉業博覽羣集於經史傳註字句疑似
者每抉摘其同異謬誤而舉正之子友杭編修堇浦張
孝廉南漪全庶常謝山世推淹雅聞君持論侃侃咸遜
爲不如也乾隆辛未福州太守兩湖徐公耳君名延修
郡志時同局五人皆閩中鉅老宿學發凡起例提要鉤
元必於君取裁其爲前輩傾倒如此甲戌削稿還杭州

未逾月復應荊州葉太守之聘纂輯荊州郡志予考福
州爲閩南首都

國朝定鼎以來迄無專志荊州府志修自康熙乙丑距
今亦七十餘年矣君於二志掇拾散佚補遺訂誤廣蒐
載籍條分件繫凡一字之疑一語之譌焚膏繼晷翻閱
達旦必廉得歸宿而後已其於

昭代之制作成憲所垂及人物之貞邪風俗之變遷可
爲風誠者九拳拳詳紀焉引據也確辨證也精書之成
也有倫有要文贍而事核洵足以備史氏之采擇資吏
治之考鏡而君之心力亦瘁於此矣昔朱子爲郡縣所

至必求其圖經翫之以習知其方土之故爲出治之本
今司民社者視爲不急之務聽其湮沒幸有銳意修舉
者或簡陋從事秉筆乏才識非燕卽穢嗚呼通都大邑
志乘之殘缺者多矣安得如君百十輩俾之載筆次第
排纂以成一代之佳志耶君事親孝友于兄弟門內無
閒言戊寅春三月爲二親營葬於龍井躬督畚鍤之役
且築且泣體素羸弱用是咯血數升封土未乾病竟不
起哀哉歿年四十有五生平詩文不苟作作必卓絕可
傳歿後多遺失僅存十駕齋詩文一卷子一燿

槐塘氏曰君歿逾月難弟廷榕書來云君病中出予手
札示家人以不得閒見爲恨且云吾於一切世味淡然
無所慕悅惟友朋之樂不能暫捐感逝懷今黯然者久
之嗚呼茫茫宇內知己有幾里門二三舊侶年來零落
殆盡如君之行誼文章尤予往來心曲而不能一朝去
者今復怛化氣類益孤追維曩遊愴乎有餘悲矣

金文學家傳

君諱澧字有蘭錢塘縣學生世居徽郡之休寧縣曾祖
鼎臣翁始遷於杭遂占籍焉祖維甸翁舉丈夫子四君
父大聲翁其仲子也嗣因伯父分華翁歿無子繼君爲
後君幼穎慧絕人器宇凝重甫就外塾日讀數十行年

十一從學於予每有質問多傳註疑似閒未發明者長老咸嗟異之既長學文於胡質孚朱開武兩先生業日進文譽日起其爲文也守先民矩矱取鎔經義雅健不羣力祛纖佻浮靡之習年二十一補博士弟子員四十有五餼於虞庠試輒冠其曹聲儔一黌金氏素以孝友著稱里門兄弟羣從閒親愛篤摯自白羽階兩君與予交垂五十年其家範所飫聞君孺染耳目融融愉愉迨析居仍以華萼榜其堂承先志於勿替其執妣汪太孺人之喪也自含殮以迄治窀窆無違禮撫育三女弟笄而嫁恩禮有加與人交坦率無城府言必由諸衷行必循

諸軌真意相孚歷枯菀而不改近戚密友至今有過君書堂而隕涕者予衣食奔走朔南靡定每歸必暱就予摳衣隅坐執禮惟謹琴歌酒讌之餘相得歡甚且以子珏締姻於子女孫不較處境豐嗇蓋異於視師門而同秦越人者矣則君之行誼文章執筆而書之非予屬而誰屬耶抑聞君四十以往縱讀經世之書凡古今之利弊民生之休戚指陳侃侃若印印泥而匙勘鑰無不吻合方期爲世大用以無負生平所學迺十踏省門竟不得一充秋賦年五十八齋志以死嗚呼有才者不必有命其信然與德配胡孺人淑慎有賢聲生子三椿梁昇

榑坊文和 卷三
簞室劉孺人生子五楷杰珏本杭孫二世昌世順

吳太學家傳

君姓吳氏諱城字敦復號甌亭世爲歙縣巖川人六世祖伯遠公占籍錢塘考尺鳧翁以詩古文擅名東南尤工倚聲鏤板行世喜聚書凡宋雕元槧與舊家秘冊若飢渴之於飲食求必獲而後已君幼就塾師受舉子業弱冠以國子生應鄉試然非性所好也遂謝去克承先志殫心羣籍插架所未備者復爲搜求每日綜理家政接見賓客少暇卽校勘訛脫竝成善本數十年來或久假於戚友不歸或遭胥篋以去多有散遺君嘗客遊京

師於報國寺市上見有宋版許丁卯集先公之題跋私印宛在不覺狂喜出豐價購得之一時輦下名流咸歌詠以紀其事家有繡谷亭亭前朱藤一本爲尺鳧翁手自攜植歲月寢久輪囷盤曲枝葉上升於架陰蔽四簷君愛護唯謹花時柔條下垂如瓔絡蜂喧鄰巷必置酒高會出所藏古名甕酒器一百八件以觴客復繪爲朱藤圖勾石交題詩於畫之四周以述先澤蓋君純孝性成雖一書一樹之畱遺惓惓不忘如此顧月田明府歸田後招里中襟契結南屏詩社駕扁舟策藤杖春秋佳日遊於湖山幽邃之地會必有詩君詩獨抒性靈蒼秀

拔俗一洗調鉛殺粉之習四座傳觀莫不激賞君家故業
齟中年以往不耐煩囂舉而委諸仲弟玉垣時從南屏
焚虛讓山兩上人作山水遊冰牀雪被借榻緇廬參三
乘之宗旨又作禪龕一座設於讀書之瓶花齋杜門却
軌二六時中每下幔趺坐龕中如入定然顧念吾杭一
郡爲雅材淵藪

昭代以來有專集者寥寥其間鴻篇傑作名章秀句湮沒
失傳者不知凡幾爰銳意蒐羅上自簪組下迄青衿韋
布方外閨秀得二千三百餘家或因人以存詩或因詩以
傳人甄錄不遺篇什叢雜未及編次瘁十餘載之

心力而君已病肺不起矣沒年七十有一病中屬季弟
玉墀稍爲釐正繕成副本藏諸篋笥嗟乎山棲谷隱之士
撚髭叉手苦吟畢生聲沉響絕者固無論矣亦有達官
貴人及身不暇開雕子孫不知寶護棄之敗篋鼠傷蠹
蝕馴致零落漸滅者夫豈少哉君乃取而一一表章之
都爲一集長畱天地詎不偉歟子三人長爲金次中麟
俱補博士弟子先卒叔子惠金國學生嗣季父蘭州府
同知東柯公爲後孫二長荀龍諸生次汝升國學生曾
孫二棠棨

友贈君家傳

贈君名漣字千波姓及氏世爲杭人得姓始於虞廷之
及斯羅長源撰國名記謂及斯國於齊地世爲有及氏
是以國爲氏也唐以前官闕不著宋建炎閒有官右職
者自汴梁徙家鹽官而吏部侍郎熿祕閣學士晉均有
重名於時譜牒被燬世系脫畧卽徙居省城亦不能訊
知爲何代矣相傳前明中葉有孝廉雲橋公與從弟龍
山公竝官司訓居貢院東今所稱學官巷是其舊址也
雲橋公四世孫昭叔公諱朝焜爲君曾祖始遷居大方
伯里祖公遠公諱均郡庠生考緯成公諱錫武潛德勿
耀以醇謹鄉里稱長者昭叔公有人倫鑒當徐文敬公

爲諸生時一見嗟異之曰此公輔器也會徐來議婚遂
以三女歸之未幾卒復以第五女續婚焉文敬公官冢
宰

予告回里爲外舅父母置祀產若干畝以供春秋墓祭
之需至今勿替緯成公弟漢宸公諱錫鬯康熙壬午舉
於鄉計偕報罷疾作卒於京無子緯成公卽以季子婁
江爲之後婁江醇謹似其父勤學工文章從遊王雲廷
封公門公愛之妻以胞妹雍正己酉領鄉薦明年亦計
偕歸病卒王孺人痛無子誓以身殉首觸棺血濺袂哀
號聲徹四壁見者無不助泣君亟抱次子蕙拜孺人前

曰此吾弟子也毋徒傷身爲幸善撫育之慰老姑痛子
心且告且哭哭聲震一堂子時入拜柩前淚濕襟袖不
能止君少孤家貧力學事父母吳太孺人至孝饒夔恒
不繼不得已棄書逐什一之利雖隱闖闖中人事少暇
手一編不廢夜則假戚友通鑑綱目二書篝燈反復披
閱密友過從每貰酒煮菽乳相娛樂飲酣劇談舉上下
千數百年人才之邪正政治之得失洞燭其興衰治亂
之所由而詳述其本末精於史學者多遜之兄弟四人
湧西靜瀾兩兄以中壽死弟婁江又歿經營喪葬心力
交瘁食指日益繁乃北走京師旋轉客滄州及山東海

豐旣謀甘脆之奉亦下贍諸寡孤所至受鉅萬金寄不
私一錢篋中所主欽其行誼禮爲上賓事無鉅細咸諮
之時才子荃姪蕙已先後補博士弟子員每報平安命
以所課藝郵寄文佳則色霽閒有疵瑕遺書督責之曰
藝精於勤毋悠忽以愒曰中遭吳太孺人憂戴星奔入
門褰繆帷一慟幾絕曰吾之行役三千里外者徒爲負
米計而今竟何如言已嗚咽不自勝營葬畢復遊海豐
居無何慨然曰人生如電抹違松楸而羈異地奚爲者
遂束裝歸杜門不出遇風日清美偕二三舊侶遨於湖
山佳處樂而忘倦視人世聲利馳逐之場掉頭不顧蓋

中有所得而自全其天者多也乾隆己卯荃登賢書君一啓顏曰吾家讀書一脈庶有所續迨官河南盧氏令必以清慎勤相勗曰此服官三字箴也奉此以往上以報國下以恤民無忝厥職世所稱能吏非所望於若也荃於乙未秋陳情終養歸循陔視膳融融愉愉極天倫樂事君於歲時享祀必親自綜理不肖笏蓋尊祖敬宗之孝思老而彌篤云生於康熙丁丑年十月初三日歿於乾隆丁酉年九月十九日享年八十有一

敕贈文林郎如子官配徐孺人有賢行先卒

敕贈孺人子一卽荃孫三曾孫一君女妻子姪彭壽君姪蕙又爲子兄館甥蕙之二女復爲子孫婦是里中積素累舊之好莫如子兩家而溯自束髮以迄垂白遊從往來之密亦莫如子兩人爰因荃之請撫拾其本末以諗後人無腴詞無溢美擬諸有道之碑或無媿焉

王拙餘家傳

乾隆丁酉年七月十九日日將夕有蒼頭叩門持書來發函則予老友王拙餘命孫世紳代書之札也札稱僕病在不起矣平素預戒家人死後不得作行述恐涉粉飾誇詡徒滋慙恧惟君知我深得惠一小傳則幸矣讀竟愕然予距拙餘居三里許初不聞其病之沉綿也越

日急趨赴榻前視之詢知艱於進食者二旬請予文甚力因語之曰古無生而爲傳之例生而爲傳若五柳先生醉吟先生諸傳不過自攄其胸臆生而他人作傳者載籍不概見拙餘曰兩卷檀弓皆言物始君不妨破例爲之且使予屬續前得讀君文或冀予疾少瘳乎乃笑應之曰予文不足擬枚生之七發也拙餘伏枕申請不已遂諾而歸迨予文旣脫稿繕寄拙餘猶令諸姪誦聽之點首稱善逾三日竟捐館舍哀哉予二人締交四十七年矣契好最深追念瀕沒誣諉之言重違其意爰就前稿而增述其世系生卒年月以詮次之拙餘姓王氏

名正功字莪山仁和人先世由宋南渡扈蹕來杭遂占籍焉舊居府橋所稱府橋王家是也曾祖諱文璧

國初廣德州學正祖諱燦

馳贈徵仕郎內閣中書舍人考諱之麟國學生

誥贈奉直大夫襄陽府同知世以文章孝友著聞拙餘幼卽莊重不佻器宇異凡兒嗜讀書工文精八法年十八補博士弟子員雍正丙午鄉試以五經中式副榜嗣蒙

恩旨准作舉人一體會試蓋

異數也拙餘計偕入都春官被放考授中書恪勤奉職

未敢少懈暇則檢閱舊檔心識手疏兼參考諸史雜記成中書典故一書予友杭堇浦爲之序拙餘在中書久後進者或內而卿尹外而岳牧靡不得氣以去乃浮沈三十年不得一調拙餘無幾微慍色人有惜之者拙餘曰命也予之拙也乾隆丙子論俸推陞湖北襄陽府同知嗣調漢陽府同知襄漢二郡接壤秦豫劇盜猾賊時時竄入境內拙餘督緝不遺餘力宵小懼法遠遁閭閻安枕三署府篆辛巳年於署漢陽府任內承審盜案牽累去官拙餘不一辭置辨人有惜之者拙餘曰命也予之拙也因晚年自號拙餘云予曩入京師知交中爲予

言當大金川受降時凡郊勞飲至告

廟策勳諸大典禮

內閣禮部竝命在閣諸員詳稽舊制無一應者君獨開列七條上之閣臣據以入

奏奉

旨報可循例舉行海寧相國陳文勤公謂人曰王君諳練典章直胸貯一部會典也其爲元老推重如此又聞其官湖北諸郡時宜民情順土俗悃悞無華與世之稱能吏者柄鑿不相入而苞苴不受請託不行至今襄陽士民尸祝不衰班史云居官無赫赫名去後常見思惟

拙餘有焉歸而卜居於通江橋之河涘舊患畏風疾偃仰一室終歲足不履戶外兄弟四人君實早歿拙餘事暢月書元兩兄同盤而食對榻而眠友愛無與比門內之行無閒於人言歿年七十三無子先以兄暢月第三子元仁爲嗣乾隆丙子舉人需補德清縣學教諭未赴任卒元仁無子以兄忠伯茂才第三子世紳爲後皆能以學行紹其家回憶昔年里中修襟契稱莫逆者共予九人十餘年來殂謝已盡獨予以瓠落無庸之身推排人世息影蒿廬索居而無與語旣傷逝者行復自念執筆爲拙餘傳又不禁黯然而自悼也

記

王氏女貞烈記

女氏王江南溧陽縣人國子生謙益女今知杭州府事桐岡公兄之子也幼許聘陽湖縣今知石埭縣事吳某次子嗣璟乾隆丙戌某月嗣璟病卒訃王王闕勿使女聞女廉知之請服其服往弔弗許誓以身殉服鉛粉吞金皆不死投繯二次又爲婢解救女恚甚戒婢曰汝毋洩洩手刃汝婢懼不敢言家人遂莫之防踰若干日竟闔戶自經死年甫十七云昔震川歸氏著貞女論引曾子問女未廟見而死不遷於祖不祔於皇姑壻不杖不

非不次歸葬於女氏之黨示未成婦也夫未廟見而尚不得成婦必六禮既備而後夫婦之道成遂謂女未嫁人而爲其夫死又有終身不改適者均之非禮其言似是而泥於古及作張氏女貞節記則謂禮以率天下之中行而高明之性有出於人情之外此賢智者之過聖人之所不禁世教日衰窮人欲而滅天理者何所不至一出於奇特之行雖不衷於禮亦君子之所樂道其言是矣而猶未備予謂妻道臣道一也女之許配而未嫁猶草野之人踐土而未食祿也古來國祚忽移攀髯莫逮草野之人捐軀殉國者比比而有顧可訾爲奇特之行而非禮乎女之未嫁而死亦若是而已矣王氏女閨中一孱弱女子耳矢靡他之志百折不回必求一死而後快於心此蓋日星河嶽正氣之所鍾我知雖有冥頑不靈之人一聞其事亦必心神震悚感動欷歔泣下而不能止正不必泥於古而執禮以相繩也夫樹綱常扶人紀必自妻道臣道始予故連類述之以爲後之爲人妻爲人臣者勵

十香居記

中吳朱子容亭能詩工書畫世稱三絕予頃遊津門與通縞紵之好蓋客亭自吳而齊而冀已屢徙其居矣閒

請於予曰某三十年來萍流蓬轉營巢未定歷憶所居
得十香焉曰稻曰菜曰水笠澤之區學稼圃而持竿者
也曰棗曰藕曰竹單椒秀澤閒披襟以當援琴而鼓之
地也曰茗曰墨曰酒曰篆則生平隨所止以榜者也子
曷爲我記之予惟人有六塵色聲香味觸法者也有
一溺焉卽足戕性故釋氏厲爲之防然匡廬惠永以香谷
名而維摩詰經謂聞白旃檀香可解煩毒則鼻觀微參
不若摩登伽女一咒之甚也夫善審音者察於微軫之
外善別味者辨於酸醎之餘惟香亦然劉季和欲效荀
令君致來醜婦捧心之誚是皆知香之爲香而不知無
香之香之隨地而可獲也客亭淡泊相遭寓物而不滯
風廊月榭逐境意恬則棗膏之昏鈍甲煎之淺俗人之
所驚客亭屏之固其宜耳按瑞應圖云王者有道則生
威香客亭

昭代之威香也人之賞客亭者徒躋之艾蒨篤耨而忘
爲國瑞是但知逸足之六轡如琴而不知其能致千里
也烏乎可哉

半墅齋記

代

天津凌翁庶咸於所居西偏構屋若干楹界其中之後
垂者以爲齋榜曰半墅冬護以簾夏敞其牖堦前後

羅植檉柳榆槐以爲蔭居雖近市而塵壒自遠宴息於是嘯歌於是翁蓋自有以全其樂也歲戊午予乞休南歸道出天津訪翁齋中白頭兩老人不得閒見者幾二十年矣追述舊事流連觴詠日昃忘去瀕行屬予爲文以記客有語於坐曰別墅之勑古類有之然或依山以架樓夾河以列宅極禽鳥樹石之勝以相娛樂今翁是齋無培塿之土蹄涔之水雖被以墅名恐不足據其樂也予謂人生寢食之外手足所託不踰丈尺之地樂不樂亦視其人之自處耳誠知道德之可腴仁義之可宅則一畝之宮環堵之室亦充然有以自安使放情溺志

日擾攘於聲利華廡之場相傾相軋患得患失縱連甍接棟甲第入雲我知其憺悽抑鬱將終老不釋也而又何樂焉翁少嗜讀書中年講辛研之術衣食所贏卽推以惠鄉里又割券萬金焚之翁蓋不徒自有其樂而并能樂人之樂者則居處之廣隘何足以攬其慮哉數弓之地謂卽翁之梓澤平泉可也客唯唯曰善爰詮次其語而書諸壁

水墩橋休寧族祠堂碑記

吾宗十六族支分派衍散處四方猝相遇若不相識然一序世系詢族屬則了了不爽良由統宗分支支各有

祠藉以崇享祀肅宗規聯絡宗盟矜式遠邇意良深也族祖君常公自休寧城西遷杭以孝友世其家生三子曰集生曰士明曰季溥竝能修門內之行以繼父志先是集生公謂兩弟曰吾先公卜居於杭勩業不易今欲反里門修祀事各牽於事願不得遂不可不建設支祠教督子姓用篤敬宗收族之義士明季溥二公咸曰唯士明公具幹材不克登上壽聞者惜之遺孤三長圭如次於登次西白於登公早歿嗣子又不永年圭如西白二公日夕冀承先志會有所待久而未舉迨西白公疾革語子峒等曰宗祠不建我兄弟終身之戚若輩其亟圖之慎毋怠語畢而逝其子峒請於世父圭如公隨卜地於江臯之水墩橋鳩工庀材剋期集事上奉宗祖之位本支而下循昭穆以次附焉旁闢別館一區以爲春秋子姓會食之所某安人士明公側室卽西白公慈母也守志不渝大吏請旌於

朝報可因建坊祠左祠旣成圭如公命余撰次勒石余嘗省墓至歛見吾汪氏統宗祠及各支祠規制宏敞禮儀肅然未嘗不嘆吾鄉聚族而居風俗之淳且美也今圭如西白兩公及峒之惓惓念祖澤不忘遺訓如此凡我族人各以圭如公兄弟之志爲志又何至十六族子

姓漠不相識也哉斯固敦篤本支之一事然有裨世道人心者不淺故不辭舛陋而卽其始末以記之

重濬會城各河記

代

浙東西十一郡半稱澤國而杭州爲附省左江右湖雖均爲民所利賴而實不同錢塘江則築塘以捍之而不使溢入西湖則建牖以引注之而灌輸於城中大小河以分達於城外上下兩塘河灌田疇通舟楫咸取資焉是城河之通塞所關於民生之利病匪淺鮮也自宋迄明屢浚屢淤宋史河渠志言比屋之民委棄草壤因循填塞繇來已久

國朝康熙二十四年前撫軍河陽趙公雍正四年前制府彭城李公兩經開濬閱今又數十年矣大中兩河雖通篙櫓閒段淤墊小河幾成溝瀆居民病之子奉命撫浙諮訪民生休戚稔知城河之亟需疏浚檄行飭議未及舉行今鹽道觀察徐君據磋商許福謙等申請合力捐資以襄鉅工詢之首事知卽候銓知府許君承基也生平義行前撫旣達

天聽今又樂輸不倦隨委綜理其事復遴選勤能之工商方一元金日新許兆副之是役也經始於乾隆辛卯冬十一月告成於壬辰春三月爲期僅閱五月共需白

金九千五百兩有奇計弓長七千三百餘丈攷其工段
上河自平安橋起至艮山門外施家橋止中河自鳳山
門外龍山閘起至武林門外清河閘止小河自中宮橋
起至洗馬橋止此外毘連支河東則西橫河橋起至清
泰水門止又沙河上泥橋起至化智橋止又江塘大埠
金雞橋起至會龍橋止又過軍橋起至候潮水門止又
梅家橋起至貢院東橋止西則中正橋起越寶浙局至
營河止又迴龍橋起至觀橋止又環帶河起至湧金水
門西湖閘口止支河小港靡不疏濬深通清流環繞向
苦田疇之燠旱者今則車戽有藉矣向稱舟航之膠澀

者今則往來如織矣向因運載之阻滯百貨翔踊者今
則物價平減矣向憂汲濁飲汙而疾癘時作者今則饕
餼作甘澣濯得所矣洵乎城河之通塞所關民生之休
戚匪淺鮮也觀察徐君雖司鹺政職兼水利能使業鹺
諸薦紳踴躍趨事必其平日之惠愛有足以鼓舞而激
勸之者徐君可稱能舉厥職矣董其事者心存利濟不
避勞怨辰而出盡酉而歸跋涉河干親行泥淖中畚鍤
如雲程工授食不剋不濫故費不糜而奏功速則觀察
徐君又可稱知人善任使矣旣訖工請記於予敬惟我
皇上惠愛元元凡水利農田有益民生之事內外臣工

封章入

告無不

敕部准行而浙省江海巨防頻煩

宸慮杭城河道乃一隅之利耳邇年以來若餘杭縣之南湖海鹽縣之永安湖均經挑培深厚足資保障蕭山縣之湘湖亦飭清理此外水利農田益民生者尚期賢觀察督率各守令次第舉行俾蓄洩得宜旱潦有備歲慶豐收戶享盈寧之福以上副

聖主南顧之殷此則予區區報効之微忱也夫

龍溪黃氏祠堂碑記

黃氏稱龍溪望族自唐迄今簪纓奕葉不絕代多聞人大宗祠之建歷有年所贈奉直大夫東圃公復建小宗祠以祀其考力菴公而以本支之栗主昭穆祔焉公子文田君官四川簡州知州遭生母王太宜人憂歸緣嫡母林太宜人嬰目疾不復出於大小兩祠外更建家祠一區於石美鄉之文岸專祀東圃公春秋既宗祠助祭無缺而朔望之叅出入之告一惟於家祠焉展其孝思意甚摯也考之禮自昔天子以至適士官師祭必有廟廟各異數庶人無廟祭於寢澤有淺深貴賤不同也君子將營宮室宗廟爲先自漢唐來非天子侯王無敢稱

宗廟故別之曰家廟以祭爲祠亦曰祠宋文潞公司馬
溫公皆有祠堂式古今異宜其禮一也文田君懼先德
之未彰無以申追慕之忱不遠三千里具書幣介予友
孔君敬敷請爲文記之夫祠之爲道所以敬宗而收族
宗有五其一爲大宗其四爲小宗大傳曰庶子不祭明
其宗也蓋謂非大宗則不得祭別子之爲祖者非小宗
則各不得祭其四小宗所出之祖禰也東圃公爲力菴
公季子文田君又東圃公第七子皆以支子而肩適子
之任聞者或因是疑焉予謂其未達古今之異宜也後
世宗法不立諸如繼禰繼祖繼高曾旣散無統紀而所

謂百世不遷之大宗亦未嘗首其義此其習在宋時已
有然者故程子云今不立宗子徒欲執古制以廢祭適
足長怠慢之志不若皆使之祭尤愈於已也然則因時
損益緣人情以起禮各竭其誠孰謂別設家祠者非耶
且禮云別子爲祖而先儒謂始爵爲大夫亦得稱祖黃
氏近葉自東圃公始贈大夫則其得有專祠固宜而橫
渠張子有云宗子爲士立二廟支子爲大夫立三廟三
廟爲大夫設吾家鈍翁嘗援爲支子得立廟之據東圃
公以文田君官贈大夫則其祠之建自文田不亦宜乎
聞贈公性至孝力菴公客死噶喇吧號泣欲往負骸骨

仲兄憐其幼止之獨行未幾兄又歿於外洋贈公遂謀
附海舶往中流颶風大作轉飄入呂宋呂宋人羈畱之
乃以計脫身反里卒奉父櫬以歸嗚呼犯波濤不測之
區往來無怖雖曰天誘其衷謂非孝思所感格而能然
歟它若營數世窀穸以妥先靈撫兄弟子如已子置祭
田勸家塾孝本既立諸皆一本之所推也今專祠之設
則又以孝繼孝者也文田君惟自盡其孝敬之思而能
不泥於古不侑於古吾知黃氏子姓椒聊繁衍紹孝友
之風綿詩書之澤四時用享祀事孔明其堂廡之邃峻
威儀之郁彬器具之嚴整將由五世十世以迄數十世

烝嘗勿替敬宗收族之義罔不入祠而油然以興也矣

吟香檻記

吟香檻者族弟秀峯住綿潭山館幽曠處也檻前種梅
十數本率自作詩花時哦樹下爰取昔人吟到梅花句
亦香之義而命之名予未至山館所有堂榭軒亭卉樹
泉石諸勝予弟徵時賢詩文寄余余已作臥遊矣在古
賢達偶遭轆軻或跌蕩於歌咏或寄情於邱壑若輞川
之別業浣花之草堂人遠迹湮至今豔稱不朽予弟居
大好山川之鄉獲承平優閒之樂家有

賜書門無殘客流傳後世亦足趾美前賢矣若夫早年

潜處抱幽谷之馨中歲服官貢威香之瑞予弟奚永戀
此吟香一檻哉不廢嘯歌隨地隨物而得香之趣而不
泥於香之迹是在予弟審擇之耳

記隱拙齋論文

乾隆五年歲在庚申冬十月予偕東璧先生櫛齋上舍
集隱拙主人寓齋齋後瘦竹數竿草木隕落抱貞柯而
不變嘉其有特立之節各賦冬竹詩一首予有寒如尊
者相靜答幽人哦句謬爲主人激賞已而駢談劇飲申
約卜夜令徵前事論溯古人翕張賢豪衡量道藝最後
及予因舉文章之緒以質坐上曰經國大業不朽盛事

魏文旣論之於前恒久至道不刊鴻教劉勰復述之於
後是二說也僕竊有進焉道沿聖以垂文聖因文以明
道則必握道樞以驅之歸焉宣學奧以樹之矩焉闡天
微以該之遠焉標人則以徵之邇焉陳治忽以謹之幾
焉明進退以懸之軌焉定取遣以絜之鑒焉主人曰旨
哉斯言文章云爾哉曷書之以諭有國有家者

槐塘文稿卷三終

